

國朝先正事略

國朝先正事略卷之二十四

名臣

平江李元度次青集

趙文恪公事略

公諱愼軫字遵路號笛樓湖南武陵人乾隆己酉拔貢學使錢南園先生器之曰人英也嘉慶元年成進士選庶吉士授編修庚申辛酉兩校順天試改御史奏川楚善後事宜

上偉之十年分校會試巡通州漕革陋規奏糧艘起撥事發諸積弊轉給事中十二年充江南副考官母憂歸服除補原官湖南學政某以矜愼失士心欲附公自匿列公諸子優等公仍奏劾之遂遣戍十七年授惠潮嘉道宣教化清獄訟優禮諸生海

陽普甯民械鬪擄掠聚眾久。官不能治。公馳往捕誅之。沿海民多寮居。藏匪銷賊。公悉編入保甲。毀其棚寮。水陸獲盜無數。十九年。遷廣西按察使。慶遠莠民藍耀青。假天地會結眾斂錢。有廖五桂者。苦其侵暴。思結龍虎會敵之。揭帖中有平治大元帥。及令地方助餉語。以恐嚇村民。事發布。政使請往。將大其事。公不可。自往按治。誅耀青及五桂。脅從皆杖釋之。自首免罪。民大安。復爲條約。諭民間。廣種植。浚陂塘。嚴守望。堵巖崗。摘律例中易犯者五十餘事。刊示之。廣東洋匪投誠後。漸入廣西爲盜。水路設巡船。俾商民停泊有定所。衛之以兵。行守令以捕盜。多寡定舉劾。增州縣解送囚徒路費。明年。遷廣東布政使。故事。州縣

解銀及領銀皆有規費公革之始至司庫貯銀四百萬逾年乃
五百三十萬南海桑園圍石堤九千五百丈有奇里民屢修屢
決公上言民力已困請以司庫沙坦花息及糧道庫息銀八萬
發商取息爲歲修資東省屯田五千三百餘頃賦重累民公請
減屯糧額數而酌加科則極輕之沙坦六千餘頃以抵之督撫
如議奏行又以粵俗奢靡刻行陳文恭從政訓俗二種遺規躬
節儉以示勸連山縣城工銀以裁縣故未入奏銷公捐廉償之
或曰子產之與可勝濟乎公曰濟所可濟不能盡亦不能忍也
二十三年擢廣西巡撫至則以農田水利爲急諭守令平疇修
陂塘設龍骨車以挽水山田開蔭井設井筒架作式使民倣之

粵西地接黔楚盜出沒其閒飭屬查保甲置望樓練民壯互相守望縣建卡房數十座府各以官會營巡緝柳州至省會千餘里增設水汛四十三所每卡設哨船有盜則卡船舉礮各團丁登望樓咸出堵擒終公任獲盜千七百餘人公以外盜十居七八乃稽察客民立客長籍之單身流蕩者爲游民查籍遞回山僻草寮盡毀礦廠窯榨傭丁皆立冊有保者留否則逐刊爲省例又動支司庫養廉空缺銀爲營汛工程之用西撫歲支養廉銀萬兩又梧潯二關例得動用羨餘公歎曰吾家衣食靡足身爲大臣復取盈焉將安用之當爲聖主廣布仁澤耳乃創預備倉捐銀萬二千令桂林府買穀積

貲以千金發典肆生息爲歲修費。愛日書院久廢修復之。復建
培風書院。課民間童子。柳州思恩慶遠三府縣向無書院。公斥
銀二千倡捐興建。於是象州羅城天河武緣雒容興業等縣皆
應之。道光二年入覲。

成皇帝諭曰卿誠實不欺故

皇考簡用以貽朕其益勉之。公頓首泣謝。八月除閩浙總督。公
治軍嚴重。申條約。偏頒諸鎮營汛。身自考校。備弁無虛日。參將
某驕蹇。浙江提督某玩洋務。皆奏劾之。手札司道諸鎮密令陳
所屬文武優劣。驗之以事。信賞必罰。故所用皆得人。上游四府
地僻山深。漳泉江廣人。多租山立厝爲業。凡十餘萬人。游民混

跡其間。於是會匪。擄匪。丐匪。羣聚爲害。公令各鄉就地勢聯絡。立鄉總。盜至。鳴鉦逐捕。加增緝捕經費。遣官弁按山著名匪首。皆就獲。浙洋商舩報劫。公既嚴責水師。復與兩撫議立海口漁船出入章程。水陸合捕。所部晏然。福州閩安鎮外有琅琦島。居民三千戶。多爲奸利濟匪。公訪聞。擒治。移駐水師。建礮臺。望樓。會垣門戶益重。漳泉械鬪風未已。刊故訓導。謝金鑾治法論。頒守令行之。漳州守周鎬賢吏也。以老乞去。公手書勉留。令署汀漳龍道。尤以臺灣爲慮。盡選賢能。以往未幾。鳳山民楊良斌作亂。巡道孔昭雯知府孔傳璣。不一月平之。噶瑪蘭民入山伐木。歲供道厰軍工船料。匠首苛斂無已。山匠林泳春因而爲變。公

檄鎮將捕誅之。仍博採輿論。更定採料章程。蘭人乃服。臺灣十三營。戍兵萬四千。皆自內地五十三營更替。例由廈門提督點驗。分汛其歸也。亦如之。遠者相距三千里。兵弁苦之。公變通舊制。令水陸二提督。及福州城守。分途點驗。戍兵之困。以蘇。臺本產穀地。福漳泉三府民食仰之。商運歲常百萬。江浙天津亦至焉。臺人不知蓋藏。又生齒日繁。歲稍歉。米貴。輒思爲亂。公令稽出口。未船。月報實數。酌年豐歉。定限制。俾民間常留。有餘。三年夏。浙江水災。公奏請賑卹。復捐俸倡勸紳商。得穀六千。米一萬七百銀七十萬五千。展賑限全。活無算。凡就食流民。令所至州縣。詢男婦名數。給滾單撫卹。是秋。浙中米踊貴。閩撫欲運倉穀。

往濟公以臺灣歲豐。乃奏弛海禁。招商販臺米。濟浙漸足。而閩倉如故。閩鹽不銷。官商積困。公奏減南靖長泰二縣額引。撥入臺灣府屬。并停徵商欠。官民便之。四年。奏請以明儒黃忠端公道周從祀文廟東廡。位列羅文莊公之次。故訓導侯官謝金鑾。教授德化鄭兼才有學行。敦崇名節。公敬異之。令舉祀鄉賢。五年。調雲貴總督。貴州彌望皆童山。近歲大吏勸民種樟樹。放爲收繭織紉。甚有利。而守令或以爲迂。公察所屬多未行。手教勸之。且捐給工本。抵滇南。壹意以撫靖邊夷。整飭銅鹽。爲務。旣陳銅鹽積弊。又以防邊之策。無逾屯田。日與滇撫考地圖。訪形勢。經營屯政。及安撫土司。建設碉堡。練丁防守。諸制以積勞成疾。

五月一日薨於位年六十五有 詔優卹 贈太子太保謚文恪 賜祭葬如例公少孤從舅氏王春堃遊教以勵行克已後益博覽儒先格言凡有益身心可致用者皆潛心體驗聞儕輩中嘉言善行則惕然不自己通籍後致力猶勤爲日記至易簣乃已灼知州縣之困體卹甚至而不可干以私見屬吏自道府以下懇切訓誡如師弟是非賢否喜怒不藏曰吾於人無私愛憎何必使妄相揣測耶有所詰責其人能以理自申必賞異之卒從所請遇事關民生疾苦國家憂樂者思之輒竟夕不寐必得當乃已督滇黔時病已亟猶疏劾貪墨吏數十人閱日屬稿代者發急遽追回滇人皆痛惜之公嘗顏其室曰省儉年位逾

進功益密。好善嫉惡。乃益真。且嚴。昆明錢公所謂人英者。公真無愧也已。著奏議八卷。從政錄八卷。載筆錄四卷。楡巢雜識二卷。省警室續筆一卷。讀書日記四卷。惜日筆二十卷。詩文集六卷。

湯文端公事略

公諱金釗字敦甫一字勗茲姓湯氏先世自浙江青田遷蕭山公生而端靖寡言笑四歲患痘幾不良於行家世服賈公獨奮於學乾隆五十九年舉省試第一嘉慶四年進士選庶吉士授編修朝貴爭羅致之謝不往而時時徒步從大興朱文正公遊請業督過如古聖以相爲師友十三年入直上書房母憂服闋遷侍講視學湖南累遷祭酒詹事內閣學士二十一年仍直上書房典試江南遂督江蘇學政仁宗手勅曰江蘇士子不患無才但須植德其勉力訓誨務得真才以佐國政公敬謹宣諭令多士咸喻

聖意尋遷禮部右侍郎江陰有會匪煽惑鄉民以修善獲福爲說公著福善辨曉之錄奏奏聞諭嘉其簡明透澈任滿命仍在上書房行走二十五年七月

仁宗升遐召公赴熱河襄理喪儀轉吏部左侍郎充經筵講官初

宣宗在潛邸尤敬禮公公之典試江南也

宣宗及諸皇子皆賦詩贈行公內剛外訥師道自處意所不可輒變色不宣對雖大廷亦如此以是見憚然亦浸嚮用公時尚書英和公以州縣陋規日盛奏請分別查明以定限制公奏言陋規皆出於民州縣猶未敢公然苛索恐上知之而治以罪

也。今若明定章程卽爲例所應得勢必明目張膽求多於額例之外雖有嚴旨不能禁矣。况名目碎雜所在不同逐一檢察轉滋紛擾殆非區區立法所能限制也。時總督孫公玉庭蔣公攸銛尙書汪公廷珍俱先後奏阻公疏入。

上手諭曰朝有諍臣連章入告使朕胸中黑白分明無傷於政體朕不勝欣悅之至。下所司議敘道光元年兼戶部侍郎時孫公玉庭以南漕浮收不能盡去議請八折收漕公又爭之曰康熙中奉有永不加賦之明詔此大清億萬年培養國脈之至計也。前有議加徵耗米及公費銀者均經戶部以事近加賦議駁今准其略爲浮收則不肖者益無顧忌而浮收且十倍於

往日雖告以收逾八折卽予嚴參而前此逾額者何嘗不干嚴譴卒不聞爲之減少獨於新定之額恪遵而不敢踰無是理也在督撫奏定之後不慮控告浮收在州縣縱有發覺又將巧脫其罪是限制仍同虛設徒爲盛朝開加賦之端臣竊惜之疏入事遂寢明年調戶部右侍郎憂歸起復署禮工二部侍郎兼倉場侍郎仍命在上書房行走授皇長子讀遂自戶部左侍郎遷左都御史是時

宣宗在位久熟於情僞自京師以及十九布政使司民風吏治之醜雜莫不周知凡細民含冤負讟號而赴闕者上必立遣重臣馳傳周歷窮治以申枉鋤強而公以公廉強直

屢蒙委任。自七年九月奉使山西。明年使宣化。十月使四川。明年四月還至襄城。復奉命循漢江而東。治獄於武昌。六月抵京師。十月奉使閩中。又明年二月便道還家。上冢前後三四年。過迴萬里。輶鶴所屆。虛衷約已。務達下情。而宣上德。上嘉公勤勞。每奉使還。遷賚有加。其使山西也。擢禮部尚書。使宣化還。賞紫禁城騎馬。自川楚歸。充上書房總師。傳使閩。還拜吏部尚書兼戶部尚書。充經筵講官。而公才以南北駢征。久虛輔導屬。皇長子邁疾。

聖心憂軫。陷公者。因巧肆機牙。以激上怒。於是有降補侍郎之命。重賴。

天子神聖亮公樸誠不旋踵眷公如初而公信道篤自守堅雖獲譴譴而當

天心覺悟後猶必從容奏對以畢申其說而

上亦不以芥蒂信乎古明良一德有出於尋常萬萬者而人亦罕得而知也公既降補之二年復自左都御史拜工部尚書轉吏部尚書十四年復兼工部先是御史許球劾陝撫楊名賜諸溺職狀詔公往鞫審擬有差矣而言事諸臣必欲傅治重罪至謂公有所徇縱或構蜚語以謂名賜當致厚贍於粵撫梁章矩因以得款曲於公將興大獄憾公於是公方由陝入川清查西川各屬軍需出入及長吏貪擅不法事有旨令回奏公歎

曰吾豈可避嫌而黜法哉於是條上諸言可信與不可信者折衷平允累萬言疏入

上手勅報曰事若秉公問心無愧何恤人言尋命公暫以尙書權陝西巡撫事公之治川陝獄也署按察使李廷錫涪州牧楊上容江津令郭彬圖皆公門下士並里吏議公當官而行無所避就人稱其平十七年春考績得旨賜金釧品學醇正奉使公明其交部議敘諸

上益洞鑒公之志行矣是年冬奉使勘獄張家口改歲勘獄太原五月命以戶部尙書協辦大學士尋調吏部尙書會安徽鳳陽府試生童闕於官府事聞命公偕侍郎吳公文鎔往讞既

而按事皖南及浙江還至江甯淮安稽察河漕諸利弊御史蔡
家珩以河工賠項處分過寬劾公徇私錯謬公於途次遵旨
回奏家珩復疏許諭兩責之各鑄印秩畱任尋偕宗令肅親
王敬敏等奏議鴉片烟吸食與販及官吏失察胥役賄縱商船
窩藏關津偷漏棍徒冒充官人奸民栽贓誣陷各罪名三十九
條得旨旨允行嘗是時中外又安上朝廷無事明年夷禍首發
於廣東不得逞則東陷定海南踞廈門北至於天津沿海騷動
天子以爲海島遠夷蛟螭蜃蛤之性不足與計是非且以中國
方制數萬里豈屑與區區醜虜爭一旦之命於不測之淵旣而
事連不可解在事諸臣無能折衝禦侮以紓宵旰憂而政府獨

右之遂歸咎於首任疆事之督臣以轉圜而救敗一日
上坐便殿從容問公以廣東事可付託者何人公以林文忠對
上拂之公爭益力坐是失

上旨而公亦不安於位矣始公嘗派部郎陳起詩倉差起詩以
見有差使呈請改派至是起詩聞復保送乃赴部訐控廷議坐
起詩規避奪職公亦坐錯謬鐫四級調用二十二年授光祿卿
公以衰老乞骸骨並自陳家無室宇乞畱京得 俞旨 賞二
品頂戴二十九年

孝和睿皇后升遐

上居苦次公具疏叩 安 賞頭品頂戴公敷歷 三朝周歷

五部侍郎再長風憲。歷吏戶禮工四部尚書。典江南鄉試者三。
順天鄉試者一。提督學政者再。總裁會試者再。總裁武會試者
一。知貢舉者一。署掌院學士者三。敎習庶吉士者三。命留京
辦事者四。奉命釋奠文廟者三。其他朝考殿試與較閱者
不可勝數。自官翰林時。布被脫粟。後嘗不使過之。其學以治經
爲務。主敬爲本。自明季姚江之學盛行。本朝諸儒矯之。遂成
水火。公不立門戶。不爭異同。大約本明道敬義夾持而兼有取
於良知。卽慎獨之說。以刻意勵行爲宗。督學時。重刻彭南畝先
生儒門法語以訓士。性尤篤孝。蒸蒸爲孺子慕。當辛巳假歸時。
公年已五十。贈公猶命同牀臥起。曰。吾以爲十歲兒也。其當官

廉而不峻。察而不徼。務在安靜。持大體。嘗按試海州。大風發屋瓦。多士惴惴。公移坐號舍間。神色自若。其長諫垣也。有控郛教者。株連甚眾。公察其妄。卽攜狀歸。而以誤燬於火告同官。事竟熄。其鎮定皆類此。公去位。凡十有五載。雖閉戶卻埽。每遇朝廷立一法。用一人。喜戚見於辭色。

宣宗季年。恩眷彌篤。對廷臣垂問再四。公子寬。出守鳳翔。陳謝日。召問公病體增減。起居服食甚悉。

文宗御極之四年。重赴鹿鳴筵。譙加太子太保銜。並頒給御書扁額。兩朝篤禮之盛。罕有倫比。自七十五歲後。每日晨起。鈔經二百字。十三經皆徧。日讀通鑑周易終其身。寢疾之四日。

值太夫人忌辰。猶肅衣冠。強起行禮。以咸豐六年四月十九日。薨。年八十有四。遺疏入。

上軫悼。諭稱公立品端方。學問醇正。卽日遣大臣率侍衛往奠。照尙書例議卹。賜祭葬如例。予諡文端。著有寸心知室存彙。子二。長寬。由蔭生官知府。先公卒。次修。己亥舉人。官通政司副使。

姚文僖公事略

公諱文田字秋農浙江歸安人年十六入湖州府學乾隆五十四年舉於鄉五十九年獻賦天津行在召試第一授內閣中書嘉慶四年入直軍機處是科成進士殿試以一甲第一人賜及第授修撰明年典廣東鄉試又明年典福建鄉試尋提督廣東學政十二年典試山東十五年提督河南學政十八年奉命入直南書房二十二年充會試副考官二十四年提督江蘇學政道光五年充順天鄉試副考官公裕學識負人倫鑑屢典文衡皆得士任督學時革除陋例斥僞體拔真才士習蒸蒸不變由修撰四遷至內閣學士歷戶工兵三部侍郎擢禮部尚書

以學行受兩朝特達之知。不由推輓。洊陟正卿。持己方嚴。而
蒞官勤以愼。百數十年來。學者盛談考據。往往尊漢儒。詆宋儒。
其弊流爲瑣碎穿鑿。公獨持議。謂三代以上其道皆本堯舜。得
孔孟氏。而明三代以下其道皆本孔孟。得程朱氏。而傳自五季。
以後人道不至陵夷者。宋諸儒之力也。至其所著之書。名物象
數。豈遂無一誤。然文字小差。漢唐先儒亦多有之。未足爲詬病。
嘗作宋儒論。以詔學者。烏虜是可以見公所學之正矣。然公於
漢學未嘗不究心也。生平博綜羣籍。未嘗一日去書不觀。所著
易原。春秋片日表。說文聲系。說文考異。諸書皆入許鄭之室。同
時言漢學者。未能或之先焉。尤畱意天文占驗法。嘉慶十八年。

林清之變未起。彗橫入紫微垣。道光初。彗見南斗下。主外夷兵事。公皆先事言之。人服其精識。並部務通達治體。不爲激亢之行。議論尤平易。近人所爲奏議。多切中時弊。其言曰。督撫藩臬迎新送舊。如衙門之整理。館舍之備侍。無論其爲不管官。卽例以主客情誼。亦不能盡廢。履任後。所屬吏紛紛晉謁。事又必不可已。在大吏自以爲秋毫不擾。而不知耗費固已多矣。且大吏抵任之始。諸務未能周知。迨莅事稍久。然後人才之賢否。以明風俗之醇澆。以辨方將稍有設施。而庶代者已至。更有更事未深之人。纔一莅事。動議更張。據人言爲舉劾。以此罔振作之名。不知地方情形。屬吏賢否。均未讀案。竟爲利而弊已隨其後見。

爲是而不自知其非。故不如久於其任。次第圖之。之爲得也。又曰。自古圖治之要。惟以任人爲本。近日科條過於煩密。如某州縣得一循吏。忽有四參被議之案。不能不罷斥。又如地號難治。非得人不能勝任。然才優者。或有處分合例者。才僅下中。亦不能不俾之受事。是爲吏議所格。而吏治皆不得人。宜稍爲變計者也。又曰。自數年來。開上控之端。於是刁民好逞其奸。彼見獄詞可以聳聽。則多牽引其所不快者。以陷害之。胥吏惟利是圖。則又多方株連。以困抗之。衣食粗足之家。一經官訟連染。雖立見昭雪。而資產已蕩然矣。彼所控計。不過一人。而牽涉常至十數。受丁胥之魚肉。往往道斃而瘐死。雖處原告之人。以極刑於

被誣者何補推 國家慎刑之意亦曰恐有冤抑耳然一案未結而事外之被累者相踵是一冤未雪而含冤者且數十人也又疏陳漕務情形曰乾隆三十年以前無所謂浮收之事是時無物不賤官民皆裕其後生齒愈繁用度日絀於是諸弊漸生然在州縣亦有不能不爾者所得廉俸公項斷不敷用自開倉至兌運其修理倉廩葺席木板及幕友家人書役修飯工食費已不貲加以運丁需索津貼日甚一日至其署中大小公事動須出錢料理又如辦一擬徒之犯自初詳至結案約費百數十金案愈巨則費愈多復有遞解人犯運送餉鞘等事所在需費爲州縣吏者以爲他弊一破其獲咎且愈重不若浮收尙爲上

下皆知其藉此以肥身家者不能保其必無要之不得已而爲此者蓋亦不少臣見近日言事者動稱不肖州縣竊思州縣亦人耳何至一行作吏便行同苟賤此又州縣不能上達之實情也諸疏多蒙 嘉納海內爭傳誦焉公薨於七年十月年七十還疏上

宣宗軫悼

優旨

賜卹

賜祭葬諡文僖著有邃雅堂文集

庸敏肅公事略

公諱坤字靜之號厚山直隸涿州人嘉慶己未進士選庶吉士改兵部主事累遷郎中隨圍木蘭校步射賞戴花翎擢湖南糧儲道調廣東山東兵備道皆在

仁宗朝

成皇帝御極由湖北按察使遷甘肅布政使擢授廣西巡撫調陝西巡撫時教匪戡定後議者謂南山老林易藪奸不宜墾公謂此地漢唐皆開闢金元始荒廢歷舉漢書蜀志唐書宋史證之且舉漢李翕邯鄲閭頌爲据遂加墾治至今賴焉在陝丁大母憂小祥後會回疆有軍務特旨以行衣陞見馳驛往甘肅會

總督辦理轉餉事宜。時逆回張格爾據四城精銳屯喀什噶爾。滿漢官兵三萬七千有奇。會於阿克蘇。轉烏魯木齊糧濟之。公上議曰。烏魯木齊距阿克蘇三十二站。官兵以五萬餘人計。日需糧五百石有奇。每站須置駝五百有奇。共需駝萬有六千。關內外臺站又需駝一萬有奇。烏魯木齊雇駝七千。尙缺二萬餘。請刻期購撥出關。其內地之銀餉軍火器械。卽以此駝運。又請以伊犁糧由冰嶺運阿克蘇。又議兵馬過沙漠。加給草豆添設民夫。酌給羊茶諸事。凡十一條。皆報可。大兵自進。勦至凱旋。共用帑銀千一百餘萬。轉輸不竭。無虛糜公之功也。服闕。補山東巡撫。以回疆平。加太子少保。賞頭品頂戴。調山西廣東江蘇。

巡撫遷湖廣總督。道光十二年，湖南逆獠趙金龍作亂，公親往督師。密陳湖北提督羅公思舉能辦賊，時湖南提督海陵阿已甯遠之下，堆被誘戕。副將游擊等皆嚴効。新田縣知縣王鼎銘死之。桂陽常甯諸土獠應賊起，眾號數萬。官兵未設糧臺，而所調常德水師、荊州滿騎皆不習山巖，卒至始奏罷之。而改調鎮筸苗疆兵，又以衡州水陸咽喉，而常甯屏蔽衡郡，當賊衝。祁陽又入衡，永捷徑且糧餉後路，皆派兵勇防禦。餘令堅壁清野。徽將弁分路防堵，迨湖南湖北兵大集，貴州提督余步雲雲南副將會勝皆率兵來助剿。距賊巢十餘里，會大雷雨，我兵乘勢進剿，賊悉眾抗拒於泮泉街。其地爲入山水口，有溪通舟楫。

市長數里民去賊守公以賊偪歸一路且矢其翻山長技密檄各路兵進偪合圍於是羅公思舉等晝夜督將弁立泥淖中仰擲火彈火弩延燒民舍數十戶斃賊數千賊黨趙文鳳乞降佯許之攻益急生擒其子女及頭日數百人金龍易服乘閒遁爲我兵所殺獲其尸及劍印木偶餘賊先後就殲

上嘉獎 賞戴雙眼花翎世襲一等輕車都尉在事文武晉秩有差方捷書之未上也

上命戶部尙書禧恩盛京將軍瑚松額來視師未至軍先三日奏捷會廣東逆猺趙仔青糾眾數千入楚界聲言爲趙金龍復仇公卽與 欽使率提督余步雲總兵曾勝移師剿辦敗賊於

潯江又敗之於銀江。擒仔青至衡州。磔於市。時廣西逆獠盤均華亦起事。官兵殲之芳林渡。均華爲楚界防兵所執。寘之法。而廣東連山黃瓜寨排獠復煽亂。官兵初失利。欽使奉命率曾勝往剿平之。

上逮治粵督李鴻賓。而調公總督兩廣。命辦善後事宜。時獠匪新定。公編查戶口。設獠長。獠目。漢民村寨。設練總。改殺獠同知爲邊要缺。教職佐雜。改邊俸。皆報可。未幾。越南奸民陳加海與內地游民馮生丁等。在夷洋狗頭山。嘯聚。偷入內洋。公遣官兵擊沈其入船。餘寇悉平。西洋暎咭喇來粵貿易。夷目咩嘮嘮違法度。公照例封船。停其市易。咩嘮嘮遣護貨兵船自外洋關

人虎口。我兵礮擊之。輒以礮拒。駛至黃浦。奉嚴旨督辦公檄。鎮將用大船載石。橫沈水底。復用大木筏塞水面。多設警備。斷其入省之路。其後路在老洲岡。復遣將弁用大石船過。其歸復備草船火攻。具脅之。沿海部署皆精整。禁商民無許接濟夷船。於是隄嘵嘵諸夷窮蹙。求給牌出口。訶甚恭。澳門夷商伽隄貽等助之。請命公固持之。良久乃令出虎門。奏入。

宣宗手勅曰。玩則懲之。服則舍之。尚合機宜。不失國體也。公之經濟表見者如此。公器識凝重。蚤歲畱心經世學。自官職方擢監司。任封圻。所泄皆有名績。治案牘。析及纖微。而宅心忠厚。曲盡人情。不流爲深刻。至典軍御將。剷除凶孽。皆有實效。其餘察

吏安毗弭盜救災備荒辟地設險諸善政不可殫述而其尤關國體者則在堅持定力龍服外夷驅霆躡風落其身距固宜上契

宸衷繫國安危輕重而令中外想望風采也十五年八月以疾薨於位年六十有四

帝深軫惜詔贈太子太師兵部尚書予諡敏肅諭賜祭葬如例長子端黼襲世職

朱菹恪公事略

公諱桂楨字幹臣號樸庵江蘇上元人性忠介剛實毅然以古
人自勗於外物無所動爲童子時歲浹饑公白大父請毀產贍
鄉里大父喜甚從其請知其志趣遠大益以古人期之乾隆五
十二年舉順天鄉試卽皮置舉子業究心古臣言行及宋明儒
言性理諸書曰吾他日待用而始求之恐已遲矣嘉慶四年成
進士由吏部主事累遷員外郎郎中擢御史出爲鎮遠府知府
其治郡專力民事力反常吏宿習同儕見之格格若不可親然
無不心折者郡屢饑民將流莩思惟盡出庫藏速賑爲有濟時
公文芝園公迎養在署公叩頭曰父願舍身拯民乞自今無更

念已色甚戚父愕然詰其所謂竟許之乃集士民託代奉甘旨
事士民愕然不解所謂姑應之乃盡發帑項以濟饑全活亡算
事竣攜印謁大府請罪就臬司獄士民惘然相誠曰吾儕曷太
守膚以自活於心安乎誓俟秋成輸金還庫款無角尖耗是歲
災實非常得公倡賑郡境千里無一人僵仆者黃平州盜發告
變公曰數人鼓眾非真亂也動兵則眾駭而事成矣單騎入境
呼父老縛爲首者出不戮一人而事定興義苗鬪大府已勒兵
公曰苗爲民欺忿鬪耳願以身保萬眾使使開諭之果帖服其
銳身爲民謀類此苗俗惑怪魅胥動以浮言公擇一二事嚴懲
釋眾懼今其地所傳焚木妖致甘雨等事是也居數年民俗不

變勤本業泯闕訟大府甚重之公強直自遂所至能無屈其氣
天子尤深鑒焉二十五年擢陝西潼商道道光二年擢浙江按
察使遷甘肅布政使旋調山東三年巡撫山西丁外艱服闋還
朝署禮部右侍郎七年授總督倉場侍郎九年授漕運督漕
運爲國家倉儲首務歷二百載吏丁虐穴其中爲奸利公曲計
諸弊所由始自收徵兌運開壩倉胥諸竇皆潛察而嚴窒之故
廉入而用裕轉運以時無舐滯時公有疾以剔釐積弊廢寢食
數日形骨立扶掖以走見者憂之而卒無恙人問所藥曰我不
知疾惟見官事當了耳問官事何能必了曰我先治我亦不知
爲治官事也十年調廣東巡撫旋兼署兩廣總督粵地接外洋

俗獷悍。玩禁令。乃申法制。釐海船。抑外班。攘斥夷館。凡興利治。弊皆不動聲色。有所句攝。率官弁曰。往某處。莫知其事。至則談笑就緒。故公在粵數年。莠民革面。而西洋諸國。皆震讐奉約束。惟謹。惠潮民喜械鬪。屢興重獄。公痛繩之。飭吏事。自無冤濫。始有馮某者。逆獠趙金龍。殲其家族。而囚其父子。未殺。亂定。在囚。俘中公一見曰。此冤民也。訊得實。立釋之。每秋審。讞囚。平反尤眾。十三年夏。以病屢請告得。俞旨。且諭病痊可。速來。百姓送者。空一城。或繪像以祀。公每任一官。必有數事。卓卓在人口。皆古名臣所深計。而必爲者。所餘廉俸。去時必畱備荒。歉自奉極儉。斂爲糴人所不堪。居家六年。自號覺修。日與鄉里學者考論。

行詣孝弟。姍睦諸大端。皆身先之。而平日在官。或民事不得終治者。如浙江海田。廣東械鬪之類。時耿耿懸諸心口。視世俗苟且之治。蹙然若叢垢之被其體也。

天子屢垂詢冀。其疾愈。士民望公復起。如占歲焉。十九年十一月薨於里第。年七十有三。遺疏聞。

上褒閔。照總督例。賜卹。賜祭葬。予諡莊恪。賞六歲子鎮。

舉人皆異數也。公宅心游目。不在三代下。其爲治。以教化爲主。內不動以欲外。不可屈以勢。一意於國計民瘼。孤立不懼。與人交。專以道誼切劘。如潘布衣。諮其一也。涖官明而能恕。所舉劾無不服。其公寮屬奉法。非徒以嚴見憚而已。其令行禁止有。

莫知所以然者在粵東有拆毀喚夷馬頭事夷心懾服相戒不敢出一言尤爲人所稱仰云

鄧嶠筠制軍事略

公諱廷楨字嶠筠江蘇江甯人嘉慶六年進士選庶吉士授編修乙丑戊辰會試及戊辰順天鄉試皆爲同考官十五年出爲甯波知府母憂服闋補延安府調西安時南鄭韓城有死囚皆受誣公平反其獄又以全同州發母子事陝民歌頌由是譽流京師道光元年超遷湖北按察使權布政使請免田入江而稅銀在民者十餘萬兩遷江西布政使權江西巡撫以前守西安失察屬吏事免歸旋命以七品銜赴保定起爲通永道陝西布政使權陝西巡撫六年擢安徽巡撫自嘉慶時皖中多大獄信臣覆案官吏多得罪而獄懸久愈疑鳳潁俗尤悍常以兵定

變公至。又值水災。乃親乘舟賑恤。尤精察吏所任。皆得人。悍民畏威。餘亦不敢幻訟。在安徽十年。俗乃大和。所舉任後多至大僚。十五年遷兩廣總督。時方議鴉片烟禁。公議奏以謂法行於豪貴。則小民易從。令嚴於中土。則夷貨自絀。

上趨之。未幾林文忠公以欽差大臣至廣東。映夷遂輸烟入。官甚悔罪已。而中變以兵船回泊尖沙嘴。進至穿鼻。公飭將士迎擊。六接戰。夷皆傷退。訖公任不得入虎門。林公既改督兩廣。自廣東外夷易犯者莫如閩。故改公兩江及雲貴總督。皆未行。而卒。調公督閩。浙二十年。四月夷船泊穿山洋。及梅嶺厦門。擊之。皆走。援定海。至清風嶺得旨。卻回。蓋是時夷方銳欲入閩。

而閩之海防地道多兵力散。公往來泉州、廈門、閩、署行、宵征、籌應捷出。晝吏夜牘。且詢且披。無一夕得安枕。坐前在兩廣。兵吏捕煙不力。奪職。戍伊犁二十三年。召回。起爲甘肅布政使。二十五年。再授陝西巡撫。時番賊屢擾蒙古游牧。公先權陝甘總督。卽邀擊於硫磺溝。得前所失馬牛羊以萬計。八月抵陝。時已積勞久。時時欲乞休。以前後受恩重。未敢請也。二十六年三月薨於位。年七十有二。得旨軫悼。賜祭葬如典。公機神高朗。外容異量。而制行內嚴。自侍從。歷封疆四十年。屢起屢蹟。無幾微得失意見於顏狀。

上亦諒其素而終任之。有及見公年少者。皆曰。如諸生時遇學。

人文士薦龍講論不倦於詩及古音韻學所得尤深至世俗好
尙一不以綴意尤精於吏治有神明稱其守西安也有漢中營
卒鄭魁坐置砒礮中殺人論死賣砒者賣礮者及鄰婦之爲左
驗者皆具獄成公疑之乃密呼賣礮者前曰汝賣礮日幾何枚
曰二三百一人約賣幾何曰三四枚然則汝日閱百餘人矣曰
然百餘人形狀名姓日月汝皆識之耶曰不能曰然則汝何以
獨識鄭魁以某日買汝礮也其人愕然固問之曰我不知也縣
役來告曰官訊殺人者已服矣惟少一賣礮者爾蓋爲之證訊
鄰婦言爲役所使如前言惟賣砒者爲眞蓋死者嘗與鄭魁有
違言以瘋犬死其脣青而魁買砒實以毒鼠也同州釐者以事

出其繼子。子無所歸。訟至省。公佯怒曰。此逆子也。當杖死。繫柱礎下。故久治也。事而潛令人以茶餅給其子。子奉母。母怒不食。奉其叔叔食之。至日暮。公度其母見子。倏然繫庭中。時時顧。日影待變也。意且悔。乃密呼其叔曰。汝嫂癡人耳。試以我意語之。汝撫六歲兒。至娶婦。婦死。更娶。勞苦甚矣。願信族人言。有好兒子。將爲汝嗣。汝幼而撫者。不能子。願能子長兒乎。彼利汝財。而嗣汝。願能孝養汝乎。汝死財與子。皆族人有也。卽汝何利。必欲出子者。明日官爲汝杖決。無難也。叔叩頭出。次日母子來泣謝。不復言出子事。此雖一節。可以見公之精敏矣。及爲大吏。尤嚴束。儻從無妄索。嘗閱兵當塗。或問令曰。厨傳費幾何。曰。二十千。

聞者以爲難子爾恆由編修官至巡撫爾頤雲南趙州知州

陶文毅公事略

道光十有九年六月二日。太子少保兩江總督陶公薨於位。天子震悼。詔以公任事勇敢不避嫌怨。堪式百辟。加贈太子太保。入祀賢良祠。予諡文毅。並勅建專祠於淮北之板浦。場明年又特允名宦祠之請。不由部議。於是公之勳績益炳著於東南矣。東南大計莫如鹽與漕。二百年來官民交困。大都由文法委曲繁重。致利不歸上。不歸下。而盡歸中飽。間有講求更革。釐剔者。則中飽蠹蝕之人交起而持之。畏事者率卻步。徐視莫敢肩其任。道光五年漕河大梗。詔江南大吏議海運維時上海關僧撓於南。通倉胥吏撓於北。屯船丁役撓於中。不曰

風濤則曰寇盜。不曰霽變。則曰繁費。

天子移公自皖。撫吳。毅然以身任之。首致百六十萬石。由海達天津。每石僅用銀四五錢。視河運省費一倍。人始知海運利國利民。爲東南拯敝第一策。不得以風盜霽費之說相訾矣。道光十年。公督兩江。承釐政蠹壞之後。如淮南之窩價。淮北之壩槓。兩淮之岸費。皆浮糜數百萬。仰食其閒者以億計。當事洞悉其弊。而不敢動。公謂非減價不能敵私。非輕本不能減價。非裁冗費不能輕本。遂奏裁淮南窩價。岸費。場費。二百五十餘萬。淮北則創改道不改捆之議。歸販不歸商之制。每歲暢行倍額。溢課數十萬。盡償淮北之帶殘。且劑淮南之懸引。嘗欲推廣其法於

淮南雖以衰病不果而天下皆知票鹽減價敵私爲正本清源
上策不復爲綱法所縛持矣然方公再議海運則南漕北倉撓
之議裁餼費則高商蠹吏撓之議截糧私則長蘆漕院撓之議
改票鹽則壩夫岸吏撓之羣議沸騰奏牘盈尺使公仔肩稍不
力

上之倚任稍不堅必且不能善後然後知公之犯勞怨而事未
嘗不舉蓋由遭遇

聖明而海運與票鹽後之人所宜廣其緒而恢之以蘇東南之
困而爲國家籌百世利也公諱澍字子霖號雲汀湖南安化
人嘉慶七年進士選庶吉士授編修十五年典四川鄉試著蜀

翰日記於西南形勢利病如指掌改御史疏劾部員戀棧忘親
及吏部重籤河工冒濫外省吏治諸積弊又條陳三急五宜以
靖匪徒屢稱旨巡視中城決滯獄入百有奇遷給事中巡視
南漕盡革陋規會漕般阻冰高郵禱於露筋祠一夕俛解奏膺
封祀尋授川東道有異政二十五年

宣宗卽位川督蔣公攸銛陞見奏公治行爲四川第一可大
用遂擢山西按察使入覲時欽交三案令赴任審辦是爲
公受

上知之始每遇京控獄多直交臬司不由巡撫前此未有也道
光元年擢安徽布政使安徽庫款虧空歷五次清查未得要領

公悉心鉤考。分別應効。應償。應豁。於是三十年軫轍豁然一清。因奏定章程十則。嚴交代。禁流攤。裁捐款。俾有司得專力治民。三年就遷。巡撫太平甯國旌德三縣。不通水道。漕米向由民折官辦。公奏請由司庫領銀採辦。立限徵還。以杜借墊之弊。是歲水災。潁江三十餘州縣田廬盡沒。公親勘賑遣官赴上游買米十萬石。勸捐數十萬金。區畫周至。民不流亡。明年宿州懷遠大蝗。公禱劉猛將軍廟。有青蛙烏鵲無數。一日食蝗殆盡。奏聞特頒御書匾額。公以水災既退。水利宜興。親勘壽州之芍陂。城西湖懷遠之郭塘陂。荆山口。鳳陽之花源湖。鳳臺之蕉岡湖。及潁江之圩垸堤壩。次第籌濬。又奏設豐備倉於各屬鄉村。秋收

後量力各捐。不經吏役不減糶。不出易。不借貸。歲歉卽全散之。
樂歲再捐。以數歲救一歲之荒。略如社倉法而去其弊。其後復
於江蘇仿捐豐備倉穀各數萬石。創修省志表章忠節。上及元
明。陽湖武進上元等縣以一次而題旌節孝三千餘人。或五百
餘人。創建總坊。其盡心教養多類此。五年夏移撫江蘇。值河淮
交病。漕運中阻。公奏請以蘇松常鎮太倉之漕百六十萬石歸
海運。親赴上海籌商船定雇值。檄崇明狼山及山東登萊諸鎮
會哨海口。以壯聲威。各艘由吳淞口出。崇明十墩轉成山。入直
沽口。水程四千餘里。旬月抵天津。無一漂損者。

上遣重臣赴驗米色。率瑩潔過河。運數倍。海商運漕而北。載豆

而南兩次得值。復由部發帑收買海船耗米十餘萬石。漕項銀米自解津應用。及調劑旗丁外尚節省銀米各十餘萬事竣。優詔褒美。賞孔雀翎。明年疏陳海運章程八條。欲永甦三吳之漕困。以格於部議未竟也。自道光三年後吳中連歲水災。由太湖入海之路不暢。吳淞黃浦劉河卽禹貢三江遺跡。自黃浦奪濶而吳淞中幹日微。劉河則幾全淤。是以水無所泄。當事屢議修濬不果。公疏言今日治水以吳淞爲最要。治吳淞以通海口爲最要。請以海運節省漕項銀二十餘萬兩興工。得俞旨。八年三月竣工。海潮直過崑山而西。水深二丈以外。其攔潮大壩內外刮刷淤泥立盡。公復請借帶徵緩漕十餘萬石。變價爲

濬劉河之用。部議未允。及遷總督。復與巡撫林公則徐合疏言。劉河與吳淞分流。東達太倉爲元時海運出口之路。其分支爲白茅。受常州諸水。由常熟昭文入海。近皆淤塞。關數州縣田賦之命。若開通海口。則潮沙復虞倒灌。莫若挑成清水長河。工省而利永。其海口各建石壩。置涵洞。平時築閉。以禦渾潮。潦時放水歸海。共估劉河工十六萬有奇。借帑攤徵。白茅工十一萬兩。官民捐辦。十四年工竣。適太湖蛟水驟漲。盡啟劉河白茅海口。各壩不三日。水消。歲仍大熟。父老皆歡。忭以謂百餘年來所未有也。吳中運道莫要於徒陽運河。而練湖爲其上游。孟瀆則其旁支。公自巡漕時。已條奏利害。及撫江蘇。益事講求。於六年大

濬時首將豬婆灘加浚。以除漕艘咽喉之梗。至是復籌款二萬金。先復黃金閘。爲練湖關鍵。并改建丹陽之黃泥閘。以蓄全湖之水。而運河之上游治矣。其常州孟瀆河。旱則引江湖以灌田。潦則宣洩入江。每遇運河冬月挑濬時。尤爲商船出入要路。自公加濬孟瀆。及德勝、澡港二河。而運河之下游亦治矣。其受總督事也。值私梟黃玉林伏法。前督臣大學士蔣公及鹽政運司皆獲譴。

上命戶部尙書王公鼎、侍郎寶興公赴兩淮會籌改法。爲課歸場竈之計。公謂除弊卽所以興利。因條上章程十五則。王尙書等遂請裁鹽政歸總督管理。以一事權。公於是殫心力以釐積

弊其大端著有成效者四。一曰裁浮費以輕成本。凡公費匣費岸費窩價數百萬。其利皆不歸於納課行鹽之商。故成本日重。公一切裁減。復裁鹽政陋規十六萬有奇。繳還鹽政養廉銀五千兩。本源澄而浮冒絕矣。一曰慎出納以重庫款。鹽庫不分正雜。虧那百出。又有總商筦庫。不行鹽而專領費。甚至捐輸皆出庫墊。冒支從不報銷。公奏分二庫。以正項貯內庫。備部撥雜項貯外庫。革總商以杜侵漁。永禁印本減帖諸名目。俾勿貽後患。一曰禁糧私船私以清網銷。糧艘回空。向帶長蘆私鹽。公力禁之。漕督以調劑窮乏爲詞。奏請許帶蘆私。仍完淮課。御史亦以爲言。公三疏駁之。謂不但病鹽。亦且滯漕。堅持定議。蘆私遂絕。

至儀徵商船有借官行私之弊。公一切禁杜。又力主散輪。隨到隨售。而久滯報淹之弊亦少。一日革五場十槓。以清淮北。北鹽十年無課。徧地皆私。商通岸懸。蓋出運道迂而成本重。公決計改票減稅。裁費不數月。商旅輻輳。場鹽一空。化私爲官。皆從來所未有也。初淮南以十年行六綱。淮北以十年行三綱。虧帑本七百餘萬。而以帑利貽患。後來立豫納減納帖息諸名色。以數十年後之課。豫虧之於數十年前。至道光八年。十年閒則已無可那墊。無可借貸。公承極弊之後。治事入載。完正雜銀二千六百四十餘萬兩。而在岸緩納之課。尙不與焉。庫貯常實存三百餘萬。又帶銷辛卯以前殘引百三十餘萬。帶徵還未銷印本積

久復價。統引殘課三百數十萬。以代償前人之欠。公自在督撫以來。若治皖之荒政。之清釐庫虧。治吳之三江水利。他人得其一。皆是名世。而海運票鹽尤百世之利。後之壽國者。必將取法焉。公受。

成皇帝特達之知。每述職。召對十餘次。造膝密陳。言無不盡。嘗面奏。離務已有起色。總督事繁。請復設鹽政。溫諭不許。并垂詢里居山水。御書印心石屋四大字賜之。兩次考績皆優。敘十二年。捕獲梟匪。奉手勅云。卿爲幹國良臣。朕亦獲知人善任之名矣。十七年。公壽六十。御賜福壽字。并賜額曰綏。錫祐。他珍物十六種。十九年二月。因病疏請開缺。手諭云。

卿體質本非不足緣費心太甚氣血不無消耗惟望卿不日全
愈來京面晤以副眷注委任之衷情卿其善體之薨年六十有
二公虬髯山立洪音環辨絕類湘潭陳恪勤公生平宗仰亦在
是遇事奮發義形於色而胃懷洞無城府待人表裏如一用人
必盡所長凡所拔舉至方面節鉞者皆有名於時生平嗜風雅
畱心文獻於地形水利尤究心嘗登塗山以望淮登虞山以望
海登雲臺山以覽淮海形勢所至賦詩紀事俯仰今古隱然以
一身爲江淮保障自公卒後東南乃稍稍多故矣公嘗建借陰
書舍於江甯震川書院於嘉定敦善書院於海州以惠學者巡
城時建悅生堂以贍京師窮民回籍時捐漁稅議禁畧斷以利

資江之行旅他城行不可勝紀所著印心石屋文集五十六卷
奏議七十六卷陶桓公年譜四卷淵明集輯註十卷靖節年譜
考異二卷蜀輜日記四卷子枕 恩賞主事候選道

何文安公事略

京師冠蓋之數。高官大第。桀戟相望。獨道州尙書何公。起家儒素。海陟崇峻。

宸眷優異。譽望隆碩。不爲聲勢烜赫。家庭澹靜。動履平實。門生屬吏。及鄉黨後進。環集聽教。誨躬躬如老儒。諸子樸謹者。學一時魁儒。雋才靡不諧際。書冊金石。不脛而至。閩內皆布衣而壺。滄款客論文。誨古無虛日。天下士翕然歸之。蓋以文章道德繫中外望者數十年。告終前夕。有大星隕於庭。嗚乎。豈偶然哉。公諱凌漢。字雲門。一字仙槎。幼奇慧。年十六。州府試皆第一。補諸生。孤露貧苦。益力於學。夜不能具燈燭。恆然松枝自照。讀經書。

必兼傳注。夫人廖氏嘗襁兒於背。躬刈薪。致傷左目。失明。州牧汪某爲加賦事。以抗糧拘諸生數十人。解永州府。太守王公宸卽拔公於郡試者。見公名。詫曰。此眞讀書人。他日必成國器。特省釋之。後案至省。久之。獄雖解。而諸生已瘐斃七人。汪牧由刑幕起家。能著書。廣聲氣。公恆歎酷吏之可畏。而欺世盜名如汪者。世尤多不察也。嘉慶六年。充選拔貢生。廷試一等。爲吏部司官。有雜職官被議。鐫級。聲言乾隆某年有恩詔。加級。或以無冊可稽。駁之。公曰。冊雖毀。恩詔固在也。豕宰韙之。九年。舉順天鄉試。明年。成進士。殿試卷進呈。名在第四。

上以筆墨飛舞。拔置一甲第三。授編修。十二年。充廣東副考官。

復命日

上詳詢粵中吏治。與正考官花公杰據所聞以對。次日奉旨
查辦。明年分校順天試。十九年遷司業。轉中允。充日講起居
注官。升洗馬。轉侍講。侍讀。右庶子。二十四年典福建鄉試。擢祭
酒。道光二年典山東鄉試。畱督學政。轉侍讀學士。每試日靜坐
堂皇校閱。胥役悉閉置一室。嘗奏云。場中多一查弊之人。卽多
一作弊之人。又云。臣以爲防弊之道。苟挈其要領。無事煩苛。
手勅褒許。甚渥。試院中忽產著六莖。數日高七八尺。因顏曰。瑞
著書屋。竝爲之記。刻試牘。附以論文十三則。推本於明理養氣
令求之。天人性命之際。設課程。督諸生治經。科試年貌。冊中令

自注誦習何經。以便考校。故乙酉科拔貢生。多治樸學者。四年。轉通政司副使。六年。擢順天府尹。時前尹朱公爲弼。無被議事。而左遷府丞公蒙。特旨除授。召對時。有人品學問。朕所深知之。諭蓋在。

帝簡中久矣。甫莅任。聞抱養育嬰堂幼孩者。須以數十金買龍票。立革其弊。立內號簿。飭屬訊案。每月按簿催結。無畱獄。八年元旦。逆回張格爾就擒。

上以公支應兵差。爰速兩次。命優敘。順天所屬牧令。擢至四路同知。更無升途。公以人材須鼓勵。會大名府缺出。與直督會奏得旨。以西路同知辛文祉補授。遂開此例。京畿獄訟繁多。

自府縣所自理外由刑部都察院提督府奏交咨送無虛日公盡心研究大要以罪疑惟輕務歸仁厚惟於兇盜案件謂宜懲一警百謝治皆從嚴十年立春日循例進春

上召問春牛顏色起於何時公奏月令稱出土牛竝無顏色宋時頒行土牛經支幹各色略與今同始於仁宗景祐間其博洽強記多類此七月 命 皇長子往祭

孝穆皇后陵寢公以大兩時行橋道難恃請改派親王大臣上深然之卽改派署後有廢園及亭因蒔花竹爲退思之地顏曰佳晴喜雨快雪之亭志無忘民事也八月授大理卿仍署府尹事十一年署兵部右侍郎授左副都御史遷工部右侍郎兼

管錢法堂事署禮部左侍郎典浙江鄉試留督學政重經解訪
優行試事整肅士習日醇每試得經術士命教官補舉優行以
勵之胥吏冒用頂戴藉作護符嚴示禁革試院桃李門前學使
儀徵阮公所署也補植桃李數百株蔚然成林特命公偕督
臣程公祖洛鞠山陰會稽紳幕書役勾結舞弊一案獄成
帝嘉其明允十三年調吏部右侍郎兼順天府尹命卽來京
供職時歲試未竣也吏部議捐賑鼓勵章程有候補各員準捐
儘先補用一條己具稟矣公適由陵工歸司員陳起詩上說
帖於公謂如此則正途之缺轉爲捐班所有而正途亦非挾貨
不得於官方吏治所傷實多公曰君言是也議遂寢調戶部左

侍郎兼右侍郎管錢法堂事。再調吏部右侍郎。仍兼戶部右侍郎。時湖廣總督訥爾經額公奏苗疆屯防變通章程。命戶部議奏。同官因係湖南事。專屬公具稟。乃援據舊章體察。見在情形。準駁相半。總歸於遴選廉能代謀生計。同官折服。十四年。升左都御史。兼府尹如故。賜紫禁城騎馬。晉工部尚書。兼署左都御史。奉命查勘明陵。充經筵講官。十五年。充會試副總裁。教習庶吉士。十六年。奏永杜回漕銅弊。公飭查順天各屬大小水路。繪圖籌緝。始奏定水次鋪戶存貯麤米。不得過十石之例。虛署吏部尚書。十七年。吏部因京察一等人員。有先由御史改官者。已議駁矣。公以不勝御史。非不勝外任者。比苛繩恐妨言。

路援筆改議遂奉 俞旨十九年調戶部尚書仍署吏部尚書
充順天鄉試副考官時長子編修紹基亦典試福建距公使閩
時凡二十年父子同科典京外試前此惟乾隆丙子科劉文正
文清公庚戌科劉文定公及青垣侍郎而已後先濟美同列榮
之公於吏工戶三部皆久任遇公議多賴公主持從容正直熟
思利弊鉅細一無所苟於政體人才特爲顧惜戶部假照案發
先後在捐納房司員皆獲咎公從容爲

上言其中人才甚有可惜者而許其捐復之 旨隨下考功司
議處有近於文致者必往復剖論冀存寬大工部素稱壅滯於
司員中拔其樸實任事者夤緣既絕升轉之路遂通嘗因病起

銷假精神未甚復元。

上顧而覺之。再給假十日。諭無庸具摺。次日公子紹基以編

修翰直召對。

上知公次子紹業知醫。詳詢進藥狀。且曰。聞汝甚能讀書。何以不知醫。紹基惶恐伏謝。

上笑曰。藥力難恃。朕所賞參枝。眞老山種。固不易得。乃荊芥大黃。亦有作僞者。故用藥不可不慎也。二十年正月值

孝全成皇后喪。齊集西淀十餘日。歸寓偶病寒。猶力疾趨公。尋疏請假。甫命下。遽薨。年六十有九。遺疏入。

上嗟悼久之。贈太子太保。賜祭葬。予諡文安。禮部來文。

曰。據諡法。勤學好問曰文。止於義理曰安。國初有得此諡者。後皆追奪。二百年來。至公乃蒙。恩特諡異數。殊榮盈廷。驚聳始悟。

聖主知公之深眷公之篤迴越尋常咸以年末古稀不及一踐揆席竟其霖楫之用重爲公惜也而公之一生履蹈中和亦實堪與先儒陸文安公企文安公媲美云公孝友純篤父廩生文繪以學行伏一時嘗授徒白牛山遇疾距家三十里公昏夜疾趨中途值雷雨忽紅燈前導至茆舍一賣腐翁延入少憩遣童子送至館而別後訪之失所在蓋孝思所感也設教於家塾鶴鳴軒教法詳盡從游者自必至軒庭至不能容雷震庭樹弟子

皆病悸。公方靜坐。若不聞知。有井水清而苦。鹹爲文祭之。得甘。既貴。後有門下士病風邪。狂舞於街市。書片紙諭之。立愈。其正直之氣類此。與兄凌灝手足依倚。未嘗暫離。爲翰林時。嘗會文夜歸。遲見兄坐候於門。後遂節飲。蚤歸。晚年友恭彌篤。居兄喪。悲慟切摯。朝紳咸爲愴動。時已官大司空。攝冢宰。年六十五矣。居恆莊敬刻厲。無欬坐。無疾趨。獨坐必斂容。急遽時作字。必裁劃正坐而後書。畫鄭君及周子二程子。張子朱子像。懸齋壁。昕夕瞻仰。家範嚴肅。稱於時。通籍四十年。未嘗一干吏議。在詞館。攻苦如諸生。治官書。自立程法。國史傳志手錄其子目。以便檢閱。於蒙古地名。滿洲人名。尤詳悉。總辦起居注。所爲前後序。

掌院曹文正公稱爲傑作。遇 詔冊文字重大者。多屬公撰擬。以公書法重海內。屬敬書全唐文。御序兩次。以講官隨圍。命和御製甚多。朝鮮琉球貢使索書。應之不倦。詩文酬答。則堅不與通。壬申戊寅大考。皆優等。一賜文綺。辛未甲戌己卯。皆教習庶吉士。殿廷文字之役。派閱覆試。朝考散館試差大考。及漢教習卷。絡繹無閒。前後尹京。兆最久。凡察吏安民弭盜。備荒諸政。不勝書任。京尹時。與兼尹盧文肅公陸文恭公和衷相得。任兼尹時。尹京者。吳公傑。曾公望。顏皆以精強久任。每有要事。恆就公。寓熟商。公子持紙筆侍側。具稟疏奏。不令書吏知也。在吏部時。同官如恩文肅公。卓文端公。精敏綜核。議事多從嚴。公常

以大體爭之初若齟齬卒無不轉圓者典試督學及教習庶常
皆諄諄訓誡如子弟故門下士以經濟學術稱者甚眾勘估督
修諸要工十餘次承辦龍泉裕陵工奉特旨改派公往每有
遷擢必兼它職九掌文衡五權塚宰四派經筵直講以京兆而
歲賜養貂以尚書而賜頭等養貂六次賜福字皆特
命入乾清宮侍書寵光稠渥可謂極儒臣知遇之榮矣督
浙學時試甯波以宋元學案發策士無知者因屬諸生勤爲蒐
訪原書百卷次第從舊藏書家得之命門人王梓材沈垚馮雲
濠與子紹基校定付梓爲序以行所著詩文曰雲腴山房集子
紹基丙申進士官編修紹業廕生少慧通天文算法先公卒紹

祺紹京皆舉人